

قانون الميكروپاڤس المصري

اسم الكتاب: قانون الميكروباص المصري

اسم المؤلف: رشا صابر محمد

تدقيق لغوي: دينا عبد الله

تصميم الغلاف: عبد الرحمن محمد

إخراج داخلي: ساندي شريف إبراهيم

رقم الإيداع: ٢٠٢١/٢٢٨٢

الترقيم الدولي: ٩٧٨٩٧٧٨٤٤١٠٦٣

### جميع الحقوق محفوظة للناشر ©

أى اقتباس أو تقليد أو إعادة طبع أو نشر دون موافقة كتابية يعرض صاحبه  
للمساءلة القانونية والآراء والمادة الواردة.  
وحقوق الملكية الفكرية بالكتاب خاصة بالكاتب فقط لا غير.



E-mail: ebharpublishing@gmail.com

تليفون: ٠١٠٦٠٢٦٧٤٠١

رشا صابر محمد

قانون الميكروپاص المصري





بما أن القانون هو القواعد التي تنظم سلوك الأفراد في المجتمع تنظيمًا ملزمًا، ومن يخالفها يعاقب، لذلك؛ رأيت أنه من واجبي ومن واقع خبرتي العملية وضع هذا القانون لينظم العلاقة بين سائق الميكروباص والركاب، وبين الركاب بعضهم البعض؛ ليصبح الميكروباص أفضل وسيلة مواصلات في مصر.

مواد القانون



# مادة (١)

## المسمايات

في تطبيق أحكام هذا القانون يُقصد بالعبارات والكلمات التالية المعاني المبينة قرين كل منها:-

الزباين: ركاب الميكروباص.

الفردة: رحلة الميكروباص من الموقف للموقف.

لسة طالع: على جميع الركاب إعطاء السائق الأجرة فكة.

أولنا؛ متبوع باسم مكان: اختصار نصف خط السير، وأول مكان سيقف فيه الميكروباص هو المكان الذي ذكره السائق.

سامحوا بعض: باقي الأجرة سوف يمنحها السائق لراكب واحد، وعلى باقي الركاب مساحته في حقهم في الباقي، أو يتخاّنقوا مع بعض برا الميكروباص.

اتمشوا الشوية دول: النزول فورًا من الميكروباص حتى وإن لم يصل للموقف أو آخر الخط دون أي اعتراض.

خلاص: عند قولها لأي راكب بجواره مقعد ما زال شاغراً تعني طلب السائق من هذا الراكب أن يجلس في المقعد الشاغر، ليحضر راكب جديد أو أن يدفع أجرة مقعدين.

أبله: يشار بها إلى أي سيدة أقل من خمسين عامًا.

يا ماما: يشار بها إلى السيدات فيما فوق الخمسين.

تناكة: تشار بها إلى الركاب التي ترفض ركوب أي ميكروباص لسوء حالته، وتعتبر إشارة لباقي السائقين بعقاب هؤلاء الركاب، كل سائق حسب ما يتراءى له، وبرده تهديد ووعيد للي ركب.

فاضية كراسي: تعني مازالت هناك مقاعد شاغرة إذا كان الميكروباص ما زال في الموقف، أما إذا كان بدأ خط السير فهي عبارة تقال فقط لجذب عدد أكبر من الركاب بإيها مهم بأن المقاعد شاغرة.

واحد لوحده: أي أنه باقي مكان واحد في الميكروباص ما زال شاغراً.

مع بعض: على جميع الركاب لَمّ الأجرة مع بعض وإعطائها للسائق مرة واحدة.

## مادة (٢) مهام الركاب

على كل راكب معرفة الوظيفة المفروض عليه القيام بها وما يترتب عليها من مهام حسب موقعه في الميكروباص وقد تتغير الوظيفة بتغير مقعد الراكب بنزول أحد الركاب وجلوس راكب آخر في مقعده. ووظائف الركاب ومهامهم هي:

أولاً: البوّاب، ومهمته هي غلق وفتح باب الميكروباص عند نزول أو صعود الركاب (الراكب اللي جنب الباب).

ثانياً: المُحاسب، ومهمته هي لم الأجرة بدلاً من السائق، وحساب الباقي وإعطائه للركاب وإعطاء الأجرة كاملة للسائق (السواق مش فاضي علشان يلم الأجرة).

ثالثاً: مسئول الأرصاء الجوية، ومهمته هي غلق وفتح الشبابيك في الميكروباص حسب الأحوال الجوية (أي راكب قاعد جنب الشباك).

رابعاً: المتحدث الرسمي، ومهمته هي التحدث نيابةً عن الركاب والسائق معاً في آنٍ واحد؛ فهو همزة الوصل بين السائق والركاب (راكب لديه الحس التطوعي).

خامساً: وزير الخارجية، ومهمته التعامل مع الميكروباصات الأخرى من توصيل الفلوس لمكروباص آخر لتُفك ثم إعادتها مرة أخرى للسائق، أو وصف طريق لسيارة ملاكي تستفسر عن عنوان مكان من السائق (الراكب اللي قاعد جنب السواق قدام).

## مادة (٣)

# التهيئة للركوب

على جميع الركاب تهيئة أنفسهم للركوب؛ فعملية الجري وراء الميكروباص للحاق به أو النزول والصعود أكثر من مرة أثناء الرحلة تتطلب رشاقة وخفة وسرعة، أما السيدات وخاصة الأنسات؛ يُمنع منعاً باتاً لبس الكعب العالي؛ لأنه يشكل عائق أمام عملية الجري والنزول والصعود أكثر من مرة.

في أحد الأيام الخريفية وأنا نازلة متأخر، وبجري علشان ألحق ميعاد الشغل، رحى الموقف علشان أركب ميكروباص الصبح، لقيت ميكروباص ناس واقفه قدامه ولسه فاضي، سألت خير يا جماعة متركبوش ليه؟ ردت عليا بنت بتناكة "محدثش عايز يقعد ورا، إطلعني أنتِ هتعرفي تقعدى ورا"، لفت نظري الصوت، ببص للأخت لقيتها لابسة

فستان وكعب عالي ييجي عشرة سنتيمتر، كنت هنصحها وأقولها أحسن لها تقعد ورا علشان يقوّمها وينزلها، بس لاقيتها واقفة بتبص بقرف والتناكة واخدة حدها معاها، قلت في سري أنتِ بقى بتعيّي عليا؛ طب والنبي لأنا هقعد ورا، وده أحسن عقاب ليك، وقلت بصوت عالي وسعوا يا جماعة أنا هطلع أفعد في الكنبه اللي ورا، وطلع راجل قعد في الكرسي القلاب اللي قدامي، وقعدت البنّت في الكرسي القلاب اللي قدام الراجل، وللناس اللي مش عارفه الكرسي اللي قعدت عليه ده بهدلة الراكب فيه بينزل ويطلع مع كل راكب عاوز ينزل أو يطلع، وعلشان نيتها مش كويسة، وعيبت عليا كل شويه حد يقول على جنب يا أسطى، والسواق يقف على جنب، وهي قاعدة مبتحركش، والسواق يزعق فيها أو الراكب اللي عايز ينزل: "ما تقومي يا أنسة يلا خلصينا"، ومرة يقولها "يا رب نخلص"، وآخر مرة قفلت الباب على الفستان بتاعها وقعدت تزعق "استنى يا أسطى؛ الباب قفل على فستاني" وهنا راح السواق مزعق فيها وقالها "كانت فردة ما يعلم بيها إلا ربنا" قامت رايحة باصة على جزمتها طبعاً مش فاهمة فردة يعني إيه في الميكروباص، والذكية بردوا بتطلع تقعد في نفس الكرسي مع إن في كراسي كتير فضيت، وأنا كل مرة السواق أو حد من الركاب يزعق فيها أقول في سري "أحسن خليك بقى رجلك تتكسر بالكعب والفستان اللي أنتِ لابساه ده، أنتِ بتركيبي ميكروباص لازم تكوني خفيفة في الحركة كده وممتنكيش على البنات اللي زيك، كلنا مرينا بمرض الكعب العالي والفساتين ده بس ربنا أكرمنا وخفيينا منه خلاص!!!"

من أجل ذلك بطالب كل راكب إنه يهياً نفسه لعميلة الركوب، وارتداء الملابس التي تساعد على خفة الحركة والسرعة في عملية النزول والصعود، فالميكروباص ركوبه مش سهل بردوا واللي يجي عليا مبيكسبش.



## مادة (٤)

### الإيثار

يحظر على أي راكب أن يتمتع بفضيلة الإيثار؛ لأنها تؤدي إلى عواقب وخيمة، ليس على من قام بفعل به إيثار فقط، ولكن على باقي الركاب والسائق بل وعلى الميكروباص نفسه.

في أحد الأيام الدنيا بتبقى زحمة كده من غير سبب، الطريق بيبقى واقف؛ ولا فيه حادثة ولا حد معدي ولا حاجة بس هو واقف لسبب غامض لم يستطع أحد من الركاب أو سائقي الميكروباص معرفته حتى الآن، مكشش في ميكروباصات خالص، وطبعاً الجري وراء الميكروباص علشان تلحق تركب حاجه بديهية، لكن الغير بديهي إنك تفكر في الناس اللي لسه واقفين في الشارع أو ملحقوش مكان بعد ما اتقطع نفسهم من الجري، ولكن أحد الركاب الأفاضل قاعد في الكرسي اللي جنب الباب يعرض على واحد

واقف في الشارع إنه يركب مكانه على الكرسي وهو يقعد مكان التباع، وبعد ما الراجل ركب، وأثناء غلق الباب سمعت تكة غريبة وحسيت أن أمر جليل سيحدث، وقلت ربنا يستر وبالفعل عند أول راكب قرر ينزل وقال على جنب يا أسطى وجه يفتح الباب متفتحش، ركن السواق على جنب ويحاول يفتح الباب أبداً، وطبعاً بدأ يغلط فينا ويقول إنتوا عملتوا إيه في الباب، وبعد عدة محاولات لاستجواب الركاب اللي كلها فشلت طبعاً، والراكب اللي عمل العملة عامل نفسه من بنها وقف السواق، ويعزم صوته وقال إحنا هنروح كلنا بالصلاة على النبي\_ كده عند السمكري علشان نفتح الباب، وهتنزلوا كلكم هناك وسكت، وساد صمت رهيب ومحدث من الركاب رجالة وستات اعترض، وكله التزم الصمت وأزعن لكلام السائق، وطبعاً إحنا عارفين السكوت علامة الرضا، وفجأة واحد كده من الركاب ربنا ألهمه بفكرة تنجينا من الحبسة اللي إحنا فيها؛ وهي إن كل واحد منّا ممكن ينزل في المكان اللي عايز ينزل فيه بس من الباب اللي جنب السواق، وبقي كل واحد عايز ينزل لازم يعدي فوق باقي الركاب لحد ما يوصل لقدام، وبعدين ينط جنب السواق وينزل من الباب اللي جنبه، وهنا انتابتني حالة من الضحك، ولأن الضحك مُعدي؛ انتقلت نفس الحالة للبت اللي قاعدة جنبي والكنبة اللي وانا وراجل كان قاعد على الكرسي القلاب، وكل ما حد ينزل ويسمع ضحكنا يبجي من الشباك ويقوم مزعق فينا ويقول لنا اللي فيه النصيب، وإحنا الستة بردوا عمالين نضحك لحد لما وصلنا الموقف وبأحمد الله إني كنت نازلة الموقف، وبذلك نزلت آخر واحدة وربنا ستر ومدوستش على راس حد ولا هرست رجل حد،

ولكن وأنا نازله السواق راح بص ليا شذراً، وقالى أنا عايز أفهم أنتِ كنت  
يتضحكى على إيه، مش مقدرة الخسارة والعطلة، ووقف الحال اللي أنا  
فيها حسبي الله ونعم الوكيل فيك!!!

من أجل ذلك بطلب من كل راكب\_وحياة عيالك يا شيخ\_ ما دام ركبت  
خليك في حالك الله يخليك وملكش دعوة بالواقفين اللي لسة مركبوش  
ليهم ربنا أحن من الكل، وعلشان السواق ميجيش على الركاب الغلابة  
اللي ملهموش ذنب زيي.



## مادة (٥)

### الروائح

يمنع منعاً باتاً على الراكب استخدام العطور، ويقصد هنا العطور التركيب التي يتم شرائها من محلات العطور كتقليد لروائح ماركات محلية وعالمية.

في صباح أحد الأيام الشتوية الممطرة، وبعد ما الميكروباص حمّل وقفل الباب، وطبعاً كل راكب قفل الشباك اللي جنبه، وأصبحت شبابيك الميكروباص كلها مقفلة علشان البرد، بدأت أشم رائحة سبرتو قوية تكفي لتعقيم غرفة عمليات كاملة، وشوية شوية بدأت أشعر بالخنقة والدوار وألتفت يمين وشمال أدور على مصدر الريحة دي منين، وأبص لباقي الركاب عايشين حياتهم عادي ولا كأنهم شامين حاجة، بدأت أشعر باختناق شديد وإني خلاص هيغمى عليا وأقول بصوت عالي "أنا مش

قادرة، هيغمى عليا" تتطوعت كذا بنت في الميكروباص وطلعت البرفيم بتاعها علشان تفوقتي بيه، وكل واحدة ترش اللي ربنا قدرها عليه، وهنا فهمت ريحة السبرتو اللي معبئة الميكروباص جاية منين وقلت بصوت عالي "بس كفاية كده أنا فقت خلاص" وأخيراً ربنا كرمني والراجل اللي جنبني نزل وقعدت مكانه وفتحت الشباك أخيراً، بدأت أتنفس وطبعاً إنك تفتح الشباك في الميكروباص أيام الشتا تعتبر جرم يعاقبك عليه باقي الركاب، وطبعاً بدأت أسمع كلام من عينة (حرام عليك صاروخ الهوا ده أنتِ صحتك مساعدك، إحنا ذنبنا إيه) وأنا أبصلهم ومستغربة وعايزة أقول لهم ما أنتوا السبب، إزاي أصحاب محلات تركيب العطور قدروا يضحكوا عليكموا ويبيعوا لكم إزازة أصنص شادية أم عشرين جنبه على إنها زيها زي الروائح الفرنسية أم عشر تلاف جنبه، وفجأة سمعت بنت بتقول مش دي اللي كان هيغمى عليها من شوية وكلنا طلعتنا البرفيمز يتاعتتنا علشان نفوقها! أهى هتعيينا كلنا أهو صحيح خيرًا تعمل شراً تلقى، وبعد النأوزة من جميع الركاب اضطريت إنى أقفل الشباك لكن حسيت إنى مش هقدر أشم سبرتو أكثر من كده، وهنا صرخت بعزم ما فيا على جنب يا أسطى نزلني وقلت لنفسى أنا أروح الشغل مشي ولا أكمل في الميكروباص السبرتو ده!!!

من أجل ذلك أطلب أي راكب للميكروباص \_بلاش والنبى، وحية أغلى حاجة عندك يا شيخ\_ البرفان قصدي البرفيم التركيب لأننا عارفين يعني إنك مش ممكن تكون شاري برفان بخمس تلاف جنبه وراشش الدنيا

ومعابها ومخلص منه كل يوم إزازة وراكب معنا الميكروباص أبو ثلاثة  
جنينه ونص.

#### مادة (٦) الزواحف

على كل راكب معرفة أن جميع الحشرات والزواحف لهم الحق في ركوب  
الميكروباص مثلهم مثل النبي آدمين تمامًا؛ فهم يتشاركوا معنا الحق في  
ركوب الميكروباص.

في أحد الأيام وأنا مروحة بعد يوم عمل مرهق وبأدعي ربنا الأقي  
ميكروباص، ببص على مرمى البصر لقيت على غير العادة الميكروباصات  
كثيرة ومتوفرة ومفيس جري ولا أي حاجة قلت يا ما أنت كريم يا رب أنت  
عالم بحالي وركبت بسلام وأمان، وبعد ما السواق طلع وقال مع بعض،  
وأثناء لم الأجرة فجأة يصرخ أحد الركاب يا أسطى يا أسطى الميكروباص  
فيه فأر!!! وكل الركاب البنات والستات أول ما سمعوا كلمة فار اللي  
تصوت واللي تقول يا لهوي، واللي تقول يا ماما واللي عمالة تقول لا لا لا،  
ولك أن تتخيل كلنا بقينا رافعين رجلنا من علي أرضية الميكروباص  
وبنص تحت، وبندور على الفار وبنقول للسواق إيه ده ازاى الميكروباص  
يبقى فيه فار، أنت بتركن فين ولا بتركب معاك مين بالضبط، طبعًا السواق  
معجبوش الكلام وقرر يضع حد للمهزلة دي قام مفرمل الفرملة المتينة جينا  
كلنا فوق روس بعض، وركن على جنب ونزل وفتح باب الميكروباص  
وصرخ فينا (انزلوا).. طبعًا، كلنا انصعنا لأمر السواق ونزلنا من غير ما ننطق  
بكلمة، وطلع هو المكيروباص وهو ماسك شومة مش عارفة جابها مينين

وقعد يبص تحت الكراسي ويخبط وهو يقول بتهمكم: "إطلع يا سي فار ما تطلع علشان الزباين خايفين منك ويبيعوا عليا وعلى نظافة عربيتي" وإحنا كلنا ملمومين على جنب وافقين خايفين من الفار، وراح نزل من الميكروباص وبصلنا وزعق "هو فين ده بقى هو أي كلام وخلاص، أنا عربيتي نظيفة وزى الفل، وبعدين إيه يعني فار مش روح زيها زيكو، مش ربنا قال كلها ممالك، هيعملكوا إيه يعني" وبصوت أجش زعق فينا "إركبوا!!!!!! مش عايز أسمع كلمة فار دي لحد ما نوصل الموقف فاهمين" وطبعًا كلنا ركبنا من غير ما أي واحد فينا ينطق بكلمة وفضلنا كلنا رافعين رجلنا من على الأرض وسايين الفار براحته ما هو روح زيه زينا وكلها ممالك من خلقة ربنا!!!

من أجل ذلك أطلب جميع ركاب الميكروباص قبول الزواحف ما هي ممالك زيها زي البني آدمين بالضبط والكل أمام سائق الميكروباص سواء.

## مادة (٧)

### اللباس

على راكب الميكروباص ارتداء ملابس تناسب كونه راكب ميكروباص فيجب أن تكون قديمة أو على الأقل مش غالية؛ حتي تجنب نفسك ألم لا يمكن تحمله.

في أحد أيام آخر الشهر اللي الواحد مش بيبقى معاه فيها فلوس، كنت رايحة افتتاح لمركز تعليمي في أحد الفنادق، وطبعًا استلقت من ماما فلوس وعملت ناصحة، وقولت أوفر أروح بالميكروباص ما أنا لوحدي ومحدث معايا، وأنا راجعة بقي هيبقى في ناس شايفني أبقى أطلب عربية قدامهم لزوم التناكة، ولبست الهدوم اللي مبتطلعش غير في المناسبات، ونزلت الشارع وماشية والتناكة واخداني على الآخر ويا أرض اتهدّي ما عليك قدي، وشاورت لميكروباص وأنا لسه بطلع لقيت ركبتي شبكت في

الكرسي وسمعت صوت ربنا ميحكش بيه على حد أبداً يسمعه؛ البنطلون شبك في حديدة طالعه من الكرسي وده شيء عادي جداً إنك تلاقيه، قطع البنطلون ضبة ومفتاح من عند الركبة وحسيت إن القطع ده جه في قلبي، بقيت أبصله ودموعي متحجرة مش راضية تنزل من الصدمة، وبأقول لنفسي يعني حضرتك تروحي تشتري ماركات غالية وتستني السيل والبلاك فراي داي علشان تشتري الهدوم وتتقاضي بيها قدام صحابك وعيلتك وزميلك في الشغل، يقوم الكرسي اللعين يعمل فيها كده وانتبهت على صوت السواق وهو بيقول اللي طلع ومبعتش الأجرة بيعت، الأنسة اللي طلعت وقاعدة ومبعتش الأجرة تبعت وبعث الأجرة وأنا بقول لنفسي آدي آخرة البخل والطمع!!!

من أجل ذلك أطلب ركاب الميكروباص وخاصة البنات إوعي إوعي من تلبسي هدومك الغالية وأنتِ هتركي ميكروباص لأنك هتحسي بألم كبير وهتفتكري كل الحاجات اللي حرمتي نفسك منها علشان تحوشي وتشتري هدوم براندات واللف أيام السيل مدام هتركي الميكروباص وفري فلوسك.

## مادة (٨)

### الشهامة

يحظر على أي راكب قام بعمل يوصف بالشهامة داخل الميكروباص مطالبة باقي الركاب أو السائق بشكره وتقديره على ما قام به من عمل؛ لأن الشكر والتقدير لا مكان له داخل الميكروباص.

في أحد الأيام الشتوية بعد ركوبي الميكروباص وبعد ما الميكروباص اتحمل والسائق قفل الباب بنفسه وقال اتكلنا على الله، وكانوا الركاب متعاونين جداً وبدأوا يجمعوا الأجرة مع بعض وبعثوا الأجرة للسائق بعد ما عدّها ظهر إن الأجرة ناقصة نفر، والسائق بدأ يقول اللي مبعثش يبعث يا جدعان، ومفيش حد بعت؛ فبدأ السواق يقول لا بقي إحنا نقف على جنب ونرجع لكل واحد أجرته ونشوف بقى مين اللي مدفّش، وهنا بدأ كل راكب يعترف والله بعت لحد موصلنا لراجل سكت مردش وشكله باين

عليه إنه من الناس اللي مشردين في الشوارع، فتبرع الراكب الشاب الشهم اللي قاعد جنبى ودفع له الأجرة وبعث أربعة جنيه والأجرة كانت ثلاثة جنيه ونصف فكده لابد وحتما على السائق إنه يدي للشاب الشهم نصف جنيه وفضل الشاب الشهم ساكت لحد ما جه ينزل وبعد ما نزل وقف جنب الميكروباص ومسك الباب بإيده وقال برخامة للسواق أنا ليا نص جنيه يا أسطى وعاوزه، وربنا ما يحكم على حد دخلنا في حوار ربع ساعة السواق بيقول له أنت تطلب الحاجة بأدب والراكب الشهم بيرد على السواق ويقول ده جزاء شهامتي وإني دفعت الأجرة ليه وللراكب الغلبان اللي مش لاقى يأكل ده، والسواق يزعق ويقول سيب الباب بقولك وده مصر على إنه راكب شهم وعازي النص جنيه، وأخيرًا واحدة ست كبيرة فاض بيها صرخت وقالت خلاص بقي يا اسطى اديله النص جنيه خرينا نمشي، وبمتهى الأدب رد السواق حاضر يا ماما بس أنا مش معايا فكة، خد جنيه أهو اتفضل، وهنا قرر الراكب الشهم إنه يذل باقي الركاب لأن محدش شكره ولا مجد فيه وفي شهامته وإنه دفع أجرة الراكب الغلبان اللي مش لاقى يأكل، وقال للسواق لا بقى أنا ليا نص جنيه ومش هأخذ غير نص جنيه، وتدخل باقي الركاب يا بني خد الجنيه وسيب الباب وهو يرد لا أنا عازي نص جنيه، واحدة بنت يا أستاذ خد الجنيه وسيب الباب خرينا نمشي، وهو يرد لا أنا عازي نص جنيه لحد ما الست الكبيرة قلبت شنتنتها فوقاني تحتاني، وصرخت بعزم ما فيها أهو لقيت معايا نص جنيه اتفضل خده وسيب الباب لكن الراكب الشهم يخلصه سينا نروح لا يقوم يقول إيه بقى لا أنا عازي النص جنيه من السواق مش من حد من الركاب أنا لازم آخده

منه هو وماسك الباب ومش عايز يسييه، وهنا جاء دور باقي الركاب كل واحد قاله اللي ربنا قدره عليه لحد ما قررت ست كبيرة تتدخل بحكمتها وخبرتها في الحياة لحل المعضلة دي وادت النص جنيه للسواق وقالت اديهوله وخلينا نخلص ونروح بقى في يومنا ده الدنيا برد، وأخيرًا عطف الراكب الشهم علينا وخذ النص جنيه وساب الباب!!!

من أجل ذلك أطلب أي راكب ميكروباص قرر يلعب دور الشهم ويدفع الأجرة ليه وللراكب الغلبان اللي مش لاقى يأكل علشان المنظرة والناس تشكر فيه وتقول له ربنا يبارك لك وربنا يخليك لأمك إنه يريح نفسه ويريحنا لأن الشهامة جزاءها عند الله مش في الميكروباص.



## مادة (٩)

### الحلفان

يحق لكلاً من السائق والركاب اختيار صيغة الحلفان التي تتفق مع قناعته، وعلى جميع الأطراف تقبل هذا الحلفان والتصديق على ما يقال بعده لأن الحلفان في الميكروباص له شكل مختلف تماماً عن الحلفان في أي مكان آخر.

في أحد الأيام الربيعية الحلوة ديه اللي الجو لا هو حر ولا برد وحظ الواحد كان حلو وقعد جنب الشباك ومستمتع بالهوا، وفجأة وبدون سابق إنذار لقيت ثلاثة شباب في عربية ملاكي بيكسروا على الميكروباص والسواق يقول ليه كدة بس يا شباب، المهم كلمة من هنا على غرزة من هنا، وقف الميكروباص والثلاث شباب نزلوا وقعدوا يشتموا في السواق وهو خايف وقاعد في كرسيه متحركش، وفجأة أحد الركاب المتهورين بطبعهم نزل طواعيةً للدفاع عن السواق الغلبان اللي مش عارف يرد عليهم وبدأ يشتم

الشباب الثلاثة ويضربهم وطاح فيهم\_ولا عتر بن شداد\_وبدأ يظهر الدم في وجه أحد الشبان الثلاثة، وتصادف وقوف الميكروباص أمام أحد المقاهي في مصر الجديدة وبدأ عمال القهوة وصاحبها يجروا علشان يفضوا الخناقة وتتعالى الأصوات بـ "صلوا على النبي يا جماعة، اهدوا ميصحش كده" ويظهر والله أعلم إن الثلاث شباب والراكب المتهور زباين في القهوة، وبدأ العمال يحاولوا يهدوا الراكب ويقولوا له دول عيال صغيرة، والشباب تقول هو اللي ابتدا وضربنا وعورنا فصاحب القهوة قال للراكب ليه بس كده يا أستاذ دول مهما كان عيال صغيرة، وكلكم زباين قهوة واحدة ميصحش تعملوا كدة في بعض، وبدأ الراكب المتهور يحس أنهم مش مصدقينه، قام الراكب بعزم ما فيه قال وحية حسام في غربته وحية حسام في غربته كمان مرة هم اللي قلوا أدبهم على السواق الغلبان اللي قاعد خايف ومش قادر ينطق ولا يرد عليهم ده، وهنا قام صاحب القهوة قال بعزم ما فيه ما دام قال وحية حسام في غربته يبقى صادق خلاص يا شباب الموضوع خلص، واعتبروا الراكب زي أخوكم الكبير، وخلصت الخناقة والشباب ركبو عربيتهم والراكب رجع الميكروباص ولا كأن فيه حاجة وقال اطلع يا اسطى، وأنا قاعدة مستغربة وبقول لنفسي ده حسام ده طلع سره باتع وبيجب من الآخر يا ترى مين حسام ده؟ وحصلة إيه في غربته علشان يتحلف بيه وبدأت أتخيل إيه اللي ممكن يكون حصل لحسام يا لاهوووي يا عين أمك يا حسام!!!

من أجل ذلك أطلب كل راكب أن يحلف بحياة حسام في غربته؛ لأن  
الحلفان بيها بيخلص أي خناقة في ثواني، كنت فين يا عم حسام من زمان  
إحنا نص عمرنا ضاع وإحنا بنتفرج على خناقات الميكروباصات.



## مادة (١٠)

### المواد المخدرة

يحظر تخدين أي من المواد المخدرة داخل الميكروباص وأي راكب يخالف ذلك يعرض نفسه للمعاقبة من سائق الميكروباص.

في أحد الأيام "الأوكازيون" كما كان يسمى قديمًا أو كما يسمى الآن "السييل"، قررت أذهب لشراء الملابس اللي كنت حطه عيني عليها ومخططة أشتريها أول ما السييل ينزل فقلت أتكل على الله وألحق بدري بدري، ورجعت من الشغل أكلت وقررت أنزل وأركب الميكروباص المتجه إلى مصر الجديدة وفعلاً ركبت الميكروباص والسواق واقف بعيد عن الميكروباص ينادي بصوت عالٍ لتحميل الميكروباص وينادي كوربة، صلاح الدين، مصر الجديدة، طلعت بنت وقعدت جنبي وفجأة بدأنا أنا وهي نشم ريحة دخان غريبة ونسأل بعض الريحة الغربية دي جاية منين

ومفیش عشر دقائق والميكروباص كله اتملاً بنات متجهين إلى محلات مصر الجديدة، وكل ما واحدة تطلع تقول إيه الريحة الغربية دي، والباقي يرد عليها مش عارفين لحد ما اكتمل تحميل الميكروباص، وندھنا على السواق يلا خلاص وقفل السواق الباب ولف علشان يركب وتتكلم علي الله وأول ما ركب زعق وقال ايه ده مين اللي بيشر ببانجو في الميكروباص؟! وبدأ يبص ورا على الركاب وطبعاً إحنا جات لنا صدمة؛ بانجو!!! أتاري الميكروباص فيه راجل واحد بس قاعد في الكنبه اللي ورا من ناحية الشمال، ودافس نفسه جنب الشباك، وده موقع مداري عن عيون الركاب في الميكروباص تقدر تعمل فيه أي حاجة من غير ما حد يأخذ باله، فكل البنات بدأت تقول في نفس واحد مفیش غيره الراجل الوحيد في الميكروباص، هو أكيد اللي بيشر ببانجو، بس بقي أنا قلت السواق هيزعق وهيقبل الدنيا وهينزله من الميكروباص، ولكن السواق بمتتهى الأدب والهدوء والحنية قال للراكب كده برضو تشرب بانجو في الميكروباص، قام الراكب رد عليه بمتتهى الهدوء والأدب والحنية برده، وقال له يعني انت مبشر بش؟! قال له لا بشر، بس مش جوه الميكروباص ده باب رزق مهما كان لحسن ربنا يغضب علينا وإحنا مش قد غضب ربنا نعمل حادثة ولا حاجة ده احنا لسه علينا أقساط، قام الراكب هز رأسه، وقال له عندك حق أنا هظفيها خلاص!!!

من أجل ذلك أطالب جميع الركاب الرجال، لو عايز تدخن البانجو في الميكروباص تعرف إن السواق هيعاتبك، بس ولا يهملك دا العتاب بين الأحباب يا راجل.

## مادة ( ١١ ) الاعتراض

يعاقب بالسب والقذف أو الطرد من الميكروباص كل من تسول له نفسه الاعتراض على أي قرار يصدره السائق؛ فعلى الركاب الإذعان إلى قرارات السائق دون أي نوع من أنواع الاعتراض، سواء كان صراحةً أو ضمناً.

في صباح أحد الأيام الصيفية الشديدة الحرارة بعد أن ركبت الميكروباص والسواق كان بشوش ووشه سمح كده وواقف عمال يهزر وهو بيحمل الميكروباص، وخمس دقائق والميكروباص اتحمل والسواق قال يلا بينا يا جماعة اتكلنا على الله بسم الله، ودور الميكروباص وانطلق في طريقه المعتاد ولم الأجرة، وهو عمال يهزر مع الركاب ويضحك والواحد بيقول لنفسه يا سلام لو كل السواقين كده، وطلب أحد الركاب اللي في الكرسيين اللي جنب السواق النزول وقال على جنب يا اسطى ورد عليه السواق وقاله

حاضر من عنيا ووقف السواق على جنب، ونزل، ويصادف وجود زيون في نفس المكان بيدور علي ميكروباص ويسأل السواق أول عباس يا اسطى؟ ورد عليه السواق بكل ترحاب أيوه اركب هتنورنا، وبعد ما ركب السواق قاله أنت حظك حلو أوي؛ الدنيا حر ومفيش ميكروباصات في الموقف يعني كنت هتفضل واقف ولا ساعتين كده عقبال ما تلاقي ميكروباص تركبه، وسأل الراكب السواق الأجرة كام يا اسطى؟ رد السواق بأدب جم ثلاثة جنيه يا نجم، وهنا تجرأ الراكب وعلا صوتة وقال لبييه! هو أنا راكب من الموقف علشان أدفع ثلاثة جنيه! رد السواق عليه بنبرة حادة وهو يبص قدامه من غير ما يلتفت له الأجرة من الموقف ثلاثة جنيه ونصف، أنا كده عملتلك تخفيض، رد الراكب هما اتنين جنيه بس، وراح راميهم على التابلوه وفي هذه اللحظة فرمل السواق مرة واحدة جابت الراكب كلهم فوق روس بعض ونزل ولف للراكب وفتح الباب اللي جنب الراكب وشدة من ياقة القميص وقال بصوت جهوري: انزل أنا غلطان اللي ركبك، اتنين جنيه إيه يا أبو اتنين جنيه، أنت أحسن لك تفضل واقف كده في الشمس تقور دماغك، أو تروح مشورك مشي، اللي زيك مينفعش يركب ميكروباص ودفع الراكب على الأرض وزقه برجله والراكب بقى يدحرج على الأرض ولا أنبوبة البوتاجاز، وأنا والباقي فاتحين بقنا من الصدمة مش عارفين نعمل إيه، ورجع السواق وركب الميكروباص وقالنا بصوت كله حنية متخافوش يا جماعة ولا مؤاخذه أنا أصلي مبحش حد يعترض على أي حاجة بقولها أو بعملها، هو مش زيكوا أنتوا ناس حلوين وزى الفل مش بتعرضوا ولا بتبرطموا بينكوا وبين

نفسكوا صح ولا إيه، وكل الركاب في نفس واحد صح طبعاً طبعاً، هو  
غلطان طبعاً عندك حق إحنا عارفين الناس ديه بتتحذف علينا منين!!!  
من أجل ذلك أطلب جميع الركاب بتوخي الحذر بعدم الاعتراض على  
أي حاجة يقولها السواق وخاصةً ما يتعلق بالأجرة حفاظاً على المتبقي من  
كرامتك.



## مادة (١٢)

### الميكروباص، والشرطة، والست المصرية

إن العلاقة بين الميكروباص والشرطة علاقة عكسية؛ أينما وجدت الشرطة اختفى الميكروباص، وتوافر الميكروباص يعني عدم تواجد الشرطة. في أحد أيام بداية الدراسة اللي الطلبة كلهم بينزلوا في وقت واحد، وخاصة طلبة الجامعات والمعاهد علشان يعرفوا الجدول ويدفعوا المصاريف ويشترى الكتب ويقعدوا يشفوا الغنيمة التي تحصل عليها كل واحد من أبوه بعد ما ضحك عليه وزود في تمن الكتب والمصاريف، في الوقت ده بالذات واحنا مروحين بتبقى الميكروباصات زحمة جداً لأن كل طلبة الجامعة والمعاهد مع الموظفين والعمال كله بيقيمى في الشارع في وقت واحد، وده بيمثل ضغط على الطرق، والميكروباصات، وجميع وسائل النقل، وجهاز الشرطة مشكوراً ينزل لجان لتيسير حركة المرور، ولكن أول ما سواقين الميكروباص يشوفوا عربية الشرطة الموبايلات تشتغل وينبها

بعض وتبدأ الميكروباصات في الاختفاء، وكل سواق يياخذ القرار اللي يناسبه فواحد ينزل الركاب ويقول لهم إن الميكروباص عطل ومش هنكمل، واللي يقول بكل صراحة أنا عليا قضايا ولو الحكومة هتاخذني؛ هتاخذني بالميكروباص بالركاب اللي فيه وطبعاً الركاب تخاف و تنزل جري وهو ياخذ الميكروباص ويجري على أقصى سرعة، وفي مثل هذه الأجواء من كل عام يبدأ الرجال من الركاب تشاور لأتوبيسات النقل العام وتشعبط فيها علشان تروح، ولكن بقى الست المصرية ذات الرؤية الصائبة عارفة إننا كسيدات وبنات لا يمكن نتشعبط في الأتوبيسات مش علشان حاجة لا سمح الله ولكن لأننا بنبقى شايلين طلبات المدارس أو العروض اللي اشتريناها من السوبر ماركت علشان سندوتشات المدارس فيايدينا مش فاضية؛ هنتشعبط ازاى بقى! وهنا تتجلى حكمة السيدات المصريات، وقفت سيدة أربعينية وقالت بقول لكوا إيه بلا شعبطة بلا قرف؛ إحنا نههدل نفسنا ليه واحنا شايلين الشنط دي كلها، كل أربعة ساكنين قريب من بعض يجمعوا نفسهم ويركبوا تاكسي ويقسموا الأجرة على بعض وعلى الفور بدأت تتكون مجموعات؛ كل مجموعة تتكون من أربعة، ويقفوا تاكسي ويركبوه، وانطلقت المجموعة تلو الأخرى، والرجالة واقفة مستتية الأتوبيس أو إن عربية الشرطة والونش يطلوا يلفوا علشان الميكروباص يظهر!!!

من أجل ذلك أنصح كل الركاب الرجال لما تشوف الشرطة أو الونش جاي اعرف إن مفيش ميكروباصات؛ فخذ بعضك واتجه مباشرة لركوب

أي من وسائل النقل الأخرى مثل المترو أو أتوبيسات النقل العام قبل  
ازدحامها، أما الستات فهم عارفين هيعملوا إيه.



## مادة (١٣)

### الإضراب

من حق سائقي الميكروباصات عمل إضراب أو مظاهرة؛ تأديباً للركاب لمعاقتهم على بعض الظواهر التي قد تنتشر بين الركاب من اعتراض على تصرفات السائق أو على الأجرة أو خط السير.

في أحد الأيام العادية، وبعد خروجي من الشغل لاحظت أن الشارع على مرمى البصر واقف والعربيات مش بتتحرك، وبدأت أحدث نفسي "خير يا رب لاحقنا أول أيام الدراسة، ولا كان فيه لجنة للشرطة، ولا في خناقة، ولا حادثة، ولا حد بيزور مصر اليومين دول، خير يا رب" ومع اقتراي من الملف وهو مكان تجمع الميكروباصات بدأت أشوف ميكروباصات كتير لا تحصى ولا تعد وبدأت أسأل زملاء الكفاح الميكروباصي من الركاب اللي واقفين خير يا جماعة في إيه؟ وكان الرد الذي نزل على كالصاعقة

سواقين الميكروباص عاملين إضراب علشان حقوقهم المهدورة!!!  
وفجأة ظهر شخص وبصوت أحش بدأ يزق ويقول مفيش ميكروباصات  
هتتحرك من هنا، إحنا مش ملطشة للركاب، لازم تعرفوا إننا بنخدمكم يبقى  
لازم تسمعوا الكلام من غير اعتراض، لكن نسمع إمبراح إن ركاب  
اتخانقوا مع سواق علشان رفع الأجرة شوية أنتوا عارفين صفيحة البنزيم  
\_أيوه البنزيم مش البنزين\_ بقت بكام؟ خليكوا واقفين بقى وشوفوا  
هتروحوا ازاي، ولعلمكوا مفيش أتوييس نقل عام أو تاكسي هنخليه يقف  
يركب حد علشان محدش فيكوا يفكر إنه هيعرف يروح من غيرنا، وبدأ  
السواقين يقسموا نفسهم إلى مجموعات لاعتراض طريق أي أتوييس أو  
تاكسي، وتهديده بتكسير زجاجه إذا وقف وركب حد معاه، وطبعًا كله  
خاف ومحدش كان يقف والتزم جميع الركاب الصمت، ووقفوا يتفرجوا  
على الإضراب وتهديد السواقين لينا بمتتهى الاستسلام، وكل واحد بيدعي  
عليهم طبعًا في سره باللي ربنا يقدره عليه من حسبنة ودعوات بان ربنا يتقم  
منهم، ولكن لحسن الحظ القسم كان قريب ووصلهم خبر الإضراب  
يدوب بس لمحوا الضابط بيركب عربية الشرطة وقبل ما يقفل الباب حتى  
كان السواقين كلهم يجحروا على الميكروباصات وكل واحد ركب  
ميكروباصه ودور وانطلقوا بأقصى سرعة وهما يقولوا الحكومة الحكومة  
وفي لمح البصر مبقاش فيه ولا ميكروباص ومفيش عشر دقائق ولاقيناها  
راجعين بعد ما اطمنوا إن الضابط مشي ورجعوا يحملوا الميكروباصات  
وبيتخانقوا على الدور وكان شيئًا لم يكن!!!

من أجل ذلك أنصح الركاب بقبول إضراب السواقين لأنهم ناس طيبة قوي؛ إضرابهم بالكثير أوي ربع ساعة، ينفكوا فيه عن أنفسهم ويرجعوا بعد كده قلبهم صافي ومش شايلين في أنفسهم حاجة لأي راكب، وياريت كل الإضرابات تخلص بسرعه زي إضراب سواقين الميكر وباصات.



## مادة (١٤)

### الصدقة

على كل راكب معرفة إن سواقين الميكروباصات الأخرى، أو التباعين أصدقاء للسائق وأنهم أهم من الركاب، ولا يضع أي راكب نفسه في مقارنة معهم وإلا عرض نفسه للعقوبة التي يراها السائق وأصدقاؤه.

في أحد أيام الخميس اللي الواحد بيصحى فيها متفائل كدة؛ لأنه بيبقى يوم هادي والصبح بالذات بيبقى الموقف رايق والميكروباصات كتير لسر ما زلت حتى الآن أحاول اكتشافه؛ فالواحد بينزل الشغل كده مفعم بالنشاط والحيوية، وركبت والحمد لله وتحرك الميكروباص في سلام وفي نصف الطريق لقيت ميكروباص عطلان وطبعًا سواق الميكروباص اللي أنا راكبة فيه ركن على جنب وراح يشوف زميل الدرب عطلان ليه! ربع ساعة واحنا قاعدين في انتظار إنه يفكر إن معاه ركاب أبدًا، وهنا بدأت حالة من التذمر

والاعتراض تسود داخل الميكروباص وتحرض إن واحد فينا لازم ينزل يجيبه وطبعًا كله خايف من رد فعل السواق وزميله قام أحد الركاب اقترح إن نندهله من غير ما حد فينا يتكلم!!! طب ازاي؟ قام قال أنا هضرب له كذا كلكس ورا بعض هيقوم بييجي علطول، وطبعًا نفذنا الخطة فورًا وأول ما السواق سمع الكلكس قام التفت ناحيتنا وزغر لنا بعينه ونفش لنا مناخيره ولم يتحرك من مكانه ورابع ساعة كمان لحد ما جه وأول ما ركب قال لا مؤاخذة يا جماعة صاحبي واكلين عيش وملح مع بعض مينفعش أسيبه، هي الدنيا اتقل خيرها ولا إيه! لازم نستحمل بعض شويه ولكن قام أحد الركاب في الكنبه الأخيرة بالاعتراض وقال احنا وانا أشغال، مش فاضين لكم، وهنا قرر السواق إظهار الوش الثاني، والتفت لنا وبدأ في وضع قواعد جديدة للميكروباص؛

وبدأ في إملاء التعليمات الجديدة وهي: -

١- اللي عاوز ينزل يقول قبلها بشوية مفيش حاجة اسمها على جنب أو يميناك يا اسطى مش هقف، ويقول بصوت عالي أسمعه مش يكلم نفسه ويرجع يقول موقفتش ليه.

٢- اللي ينزل يقفل الباب وراه مش يمشي ويسيبه مفتوح مش باب تكية هو تمام!

٣- أنا همشي على أقصى سرعة علشان تلحقوا أشغالكموا ومحدش يقولي براحة يا اسطى.

وفي هذه اللحظة كلنا بصينا للراكب اللي اعترض واتكلم ونفسنا نقوله  
كلمة منك لله كان لازم تتكلم!!!

من أجل ذلك أطلب جميع الركاب إنهم يقدروا قيمة العيش والملح  
ويتعلموا معنى الصداقة الحقيقية ويبقوا مع بعض كده زي سواقين  
الميكروباص، ورب أخ لك لم تلده أمك!



## مادة (١٥)

### التحدث في الهواتف المحمولة

يحق لكل راكب التحدث في هاتفه المحمول بأي مستوى صوت وطريقة تحدث يريدها والموضوع الذي يرغب في التحدث فيه دون أي اعتراض من باقي الركاب.

في أحد أيام الأحد اللي بيبقى الدنيا زحمة الصبح، ولكن آخر النهار ييبقى الجو رايق والميكروباصات متوفرة، رححت عند الملف اللي السواقين قرروا إن يكون موقف ليهم لقيت الميكروباصات كثير ما شاء الله والسواق عمال ينادي واحد لوحده واحد لوحده، ركبت طبعاً وكلي سعادة والركاب استقبلوني بفرح: كنتي فين من زمان إحنا مستنيينك من بدري وشوية واتلمت الأجرة على خير بدون مشاكل الفكة، وفجأة رن جرس المحمول لأحد الركاب اللي قاعدين ورايا وبدأ يتكلم وصوته يعلى ويقول أنتِ ما

تستاهليش أي حاجة؛ ما تستاهليش التضحية اللي ضحتها علشان أخطبك، أنا كان زماني في دبي قاعد ومبسوط متنغخ، دول لحد دلوقتي بيتحاولوا عليا أسافر عندهم وأشتغل هم ساعتين بس في اليوم وهيدوني شقة وعربية بدل القرف اللي بشوفه معاك، لكن أنت متستاهليش، اخوسي مش عايز أسمع صوتك، أنا كل البنات كانت تتماني، وأمهاات عيلتنا كلها والشارع كله يتمناني لبناته، وأنا بغبائي اخترتك أنت! أنا مش عارف كانت دماغني فين، ويسكت شوية وبعدين يزق ويقول أنت عاوزه إيه دلوقتي من بعد ما خربت الدنيا؟! ويسكت شوية وبعدين يقول أنت بتهدديني! لا أنت مش عارفة أنا مين وممكن أعمل إيه؛ دا بإشارة مني أطربقها على دماغك أنت وأهلك، كل ده وأنا قاعدة قدامه هموت وألف راسي أشوف شكله إيه الأستاذ العظيم ده اللي دبي طالبااه بالاسم، وبنات مصر كلها بتجري وراه وممكن بطربقها على دماغ أي حد وعمالة أقول لنفسني كل ده وراكب معانا الميكروباص ده على كده راجل متواضع خالص، وبعدين قلت خليني لما أنزل أبقى أقف قدام الباب شويه وأشوفه شكله إيه ده اللي دبي طالبااه بالاسم، ونزلت ووقفت ويا ريتني ما وقفت ولا شوفت، ولقيت نفسي بقول الحمد لله الذي عافاني مما ابتلى به غيري، وبقول لنفسني بلاش يا بت تشيلي ذنوب عليه على الفاضي بس ازاي بردوا دبي طالبااه بالاسم يا جماعة!!!

من أجل ذلك بقول للبنات اللي معرفهاش وكان البرنس بيكلمها في الموبايل كويس إنك خربتيا أنت أملك دعيالك وربنا نجاك احمدي ربنا وبوسي إيدك وش وظهر وأوجه كلمة للأخوة في دبي اللي يتمنوا الأخ

الكريم يشتغل عندهم ساعتين بس في اليوم وهايخذ شقة وعربية ويقول لهم  
أنا موجودة وبشتغل ٨ ساعات عادي ومن غير عربية كفاية الشقة أصلي  
مبعرفش أسوق.



## مادة (١٦) خط السير

على جميع الركاب معرفة أن خط سير الميكروباص ليس ما تحدده المحافظة، ولكن خط السير يحدده السائق بنفسه حسب ما تقتضي الضرورة.

في أحد أيام آخر شهر ديسمبر وبعد تمشية في منطقة الكوربة بمصر الجديدة وشراء لب وسوداني أسواني لزوم احتفال رأس السنة، توجهت إلى مكان تجمع الميكروباصات، وركبت الميكروباص بس كان فاضل أماكن كثيرة فاضية والميكروباص لسه قدامه كتير علشان يحمل، والسوداني كان سخن وريحته تجنن قلت أكل شوية سوداني لحد ما الميكروباص يحمل وشوية وجات ست كبيرة ماشية على عكازين ركبت بصعوبة وبعد ما ركبت سألت سواق الميكروباص رايح المساكن يا ابني؟ رد عليها السواق لا يا

ماما جراج بس انزلي اقفي هنا ميكروباص المساكن هيجي دلوقتي، استني هاجي أساعدك تنزلي، مش كنتِ تسأليني قبل ما تركبي علشان متتعيش نفسك، وساعدها تنزل والست تقوله معلش يا بني تعبتك، وهو بمتتهى الأدب يقول لها لا يا ماما متقوليش كده وقف الست الكبيرة مكان ميكروباص المساكن وقالها متتحركيش من هنا ورجع ينادي جراج جراج جراج ثم فجأة ظهرت بنت شابة رسمة عينها بالأبي لاينر من فوق وتحت ولا رسمة عين نفرتيتي وبتاكل كيس من البطاطس ودار بينهما الحوار التالي:

البنت: بصوت غاية في الرقة\_ مساكن؟

السواق: أيوه طبعًا، اتفضلي اركبي في الكرسين اللي قدام.

البنت: بس أنا مبجش حد يقعد جنبي..

السواق: مين قال إن حد هيقعد جنبك؟! الكرسين علشانك يا باشا.

البنت: ضحكت ضحكة غريبة..

السواق: يفتح باب الميكروباص وهو يقول اتفضلي..

البنت: شكرًا.

والسواق جزي على الباب الثاني وركب وطلع، ولسه في كراسي فاضية في الميكروباص وفضل في حوار داير بين السواق والبنت وأنا رامية ودني إني أسمع حاجة أبدًا، إني أعرف مين نفرتيتي ديه أبدًا، بس هي أكيد حد مهم جدًا طبعًا، ولقيت نفسي مخلصه نص كيس السوداني الأسواني وأنا بتفرج

على هذا المشهد الرائع، وافتكرت \_يا عيني\_ الست اللي لسه واقفة مستنية  
الميكروباص اللي رايح المساكن!!!  
من أجل ذلك أطلب كل راكب بتقبل تغير خط السير بصدر رحب دون  
إبداء أي غضاضة، ولتحيا نفرتيتي!



## مادة (١٧)

### التسول

يحذر على أي متسول التفكير في أنه يمكن أن يتسول من ركاب الميكروباص مهما كان السبب الذي سيذكره.

في أحد الأيام وأنا راكبة ميكروباص من ميدان العباسية لجسر السويس وقف الميكروباص بإشارة روكسي المعروف عنها إن الميكروباص يقف فيها مدة طويلة شوية، فجأة فتح باب الميكروباص شخص شكله غريب وعينه حمرا وصوته كأنه طالع من تحت الأرض، وزغر لكل ركاب الميكروباص نفر نفر دون أن ينطق بكلمة ثم تنحني وقال بصوا يا جماعة صلوا على النبي، فمحدث رد! قام مزعق مسمعتش حد يعني قال عليه الصلاة والسلام! على كل حال بصوا؛ دلوقتي في ميت موجود في الجامع وعليه ديون والديانة رافضين يخلوا أهله يصلوا عليه ويخدوه يدفنوه إلا لما

يدفعوا الدين اللي عليه، فكل واحد يطلع اللي يقدر عليه بسرعة وخلي بالكم الدين كبير يعني مش واحد يطلع جنية ويدهوني عايزين نستر الميت يا جدعان زي ما ربنا قال يلا ورينا فلوسكم، ويزغر للركاب إن حد يطلع حاجة أبدأ، وهو عمال يقول الميت ده ذنبه في رقابكم، هيفضل في الجامع لحد ما يعفن، خلصوني خلوني أشوف غيركم، الدين كبير يا جدعان. وبردو لا حياة لمن ينادي، إن حد يعبره أو حتى يبصله، وتهياً سائق الميكروباص للتحرك علشان الإشارة هتفتح، راح الراجل مزعق فينا وقال يعني مش هتدفعوا! ماشي بس افكروا، وراح نزل ورزق باب الميكروباص وبعد أن عبرنا الإشارة بسلامة الله بدأ الركاب يبصوا وراهم علشان يطمنوا إنهم بعدوا عن الراجل، وبعد ما اطمنوا كل واحد بقى بكلمة اللي يقول هو لسه مدفنش من امبارح! والي يقول امبارح إيه ده بقاله أسبوع كل يوم يطلع يقول البوقين دول ده حتى في راجل قاله أنا هاجي معاك أشوف الميت ده راح سابه ونزل، وراكب يقول فكرنا هبل طالع يضحك علينا عبط إحنا علشان نصدقه! طب يقول حاجة معقولة والضحك والتريقة على طريقة الراجل وأسلوبه فضلت لحد ما نزلت من الميكروباص!!!

من أجل ذلك بقول لكل متسول تُسول له نفسه إنه يقدر يضحك على ركاب الميكروباص وباخذ منهم أي فلوس: "كان غيرك أشطر".

## مادة (١٨) الفضفضة

يحق لكل راكب أن يعبر عن الألم الذي يشعر به لزميله الراكب، ويوح له عما يؤرقه في الحياة، وعلى الراكب منفردًا أو مجتمعًا مع باقي الركاب الاستماع إليه ومشاركته أحزانه.

في أحد الأيام الشتوية اللي تحس فيها إن السماء سودا كده بزيادة، وغامقة والدنيا داخله على اكتئاب، كنت راكبة ميكروباص من ميدان العباسية كنت راجعه من كورس ترجمة قانونية واكتشفت فيه إني منفعش خالص في الترجمة القانونية دي ومضايقة جدًا ومش طايفة نفسي وعمالة أقول كان لازمته إيه تضييع وقت وفلوس، مش الواحد كان درس حاجة تنفعه أحسن، ولا دراسة ولا بتاع، ما الناس كلها بتخلص تعليمها وخلاص لازم عملي فيها فركوكة يعني ما كنت اشترت هدموم ولا مكياج وأرجع أقول

لنفسى لا لا يا بت مهما كان الدراسة دي فائدة ليك برده في إيه مش عارفة بس او عي تقولي ضيعتي وقتك على الفاضي، وفجأة سمعت صوت سيده بتقول رايح الجراح يا أسطى والسواق بيرد أيوه اركبي، طلعت وقعدت جنبى وهي سيده ترتدي عباية سوداء اللون ولا بسة برده طرحه سوداء، رمت نفسها على الكرسي كأنها كنبه في بيتهم، قلت لنفسى آه هي ناقصه، حطيت وشي في الشباك وأنا بقول أنا مش عارفة الناس دي عايشين ازاي معانا كده في حد بيقعد كده وفجأة لقيتها بتكلمني ..

السيدة: سلام عليكم ..

أنا بقول لنفسى شكلها عايزة ترغي: و عليكم ..

السيدة: هو الميكروباص بقاله كتير بيحمل؟!!

أنا براخمة السنين: لأ.

السيدة: أصل الواحد بيخلص شغل ويبقى عايز يروح بسرعة ..

أنا\_ بقرف\_: آه ربنا يقويك.

وحمل الميكروباص وطلع وبدأنا نلم الأجرة مع بعض و خناقه الفكه اشتغلت وفضلت لحد نص الطريق شغاله والسواق يقول حلوها مع بعض دي أول فردة هعمل لكم إيه يعني؟! أطع لكم فلوس فكه! وأنا حاطة أيدي على خدي وباصه من الشباك وبقول هو كده في أيام بتبيجي ما يعلم بيها إلا ربنا ..

السيدة: معاك نص جنيه و تاخدي جنيه؟

أنا من غير ما أبص لها: مش عايزة النص الجنيه ده خديه  
السيدة بمتتهى الأدب والحنية: خلاص متزعلش خدي الجنيه كله، أنا مش  
عايزة باقي ولا تزعلي نفسك يا حبيبي مش مستاهله حقك عليا ..  
أنا اتكسفت من طريقتها: لا والله مش قصدي حقك عليا بس أنا مضايقة  
شوية.

السيدة\_ وهي بتضحك\_ يا أختي مفيش حاجه تستاهل، تعرفي شكلك  
راجعة من الشغل وقرفانة.

أنا\_ وبقول لنفسي أنا عارفه إنك عايزة ترغي\_: لا راجعة من كورس.  
السيدة: تعرفي أنا بشتغل شغلانة غلسة قوي؛ بشتغل في برج الأطباء من  
الساعة أربعة للساعة عشرة بكنس وأنظف العيادات وكده يعني ..  
أنا: وليه يعني المواعيد دي متشوفي ميعاد الصبح أحسن، ولا شوفي شغلانة  
تانية مادام مضايقك كده.

السيدة: أنتِ عارفة؛ أنا متجوزة راجل تعبان، ميقدرش يشتغل؛ قعيد يعني،  
بصي بقي أنا بقوم كل يوم الصبح أجهز (شندوشات) العيال، وبعدين  
أصحبهم وألبسهم، وأودبهم المدرسة، وأرجع على السوق أشترى اللي  
ممكن أطبخه على قد الفلوس اللي معايا يعني، وأرجع على البيت أروقه،  
وأجهز الغدا وأحطه للعيال وأبوهم، وأروح أجيبهم من المدرسة،  
وأطلعهم البيت، وأنزل على طول أروح الشغل وأفضل فيه لحد الساعة  
عشرة، وبعدين أروح أنا، أنتِ عارفة أنا كنت رفعية؛ مكتتش تخينة كده،

بس هعمل إيه بقى؛ الزمن \_ وبتضحك\_ أنتِ عارفة العيال بيتعبوني قوي،  
بس هعمل إيه بقى، وبتضحك!.

أنا: ببص لها ومش لاقية كلام أقوله، ويقول في سري هي كل ده وليها نفس  
تضحك!!!

السيدة: عارفة برده أصل أمي تعبانة شوية، ساعات كدة بعدّي عليها أعملها  
حاجات على قد ما أقدر، كنت هعدي عليها النهاردة بس الدكتور اتأخر في  
العيادة شوية، وعقبال ما كنست ونضفت، بكره بقى أبقى أعدي عليها،  
وبتضحك!

أنا: ربنا يصبرك ويعينك على اللي أنتِ فيه..

السيدة: على إيه يختي، هو أنا فيا حاجة؛ ده في ناس عندها بلاوي الحمد  
لله، وبتضحك..

وفجأة انتبتهت إني لازم أنزل، وبصوت عالي قلت للسواق على جنب يا  
اسطى، وطبعاً ادّاني كلمتين وأنا نازلة وقال لي "اللي عايز ينزل يقول قبلها  
بشوية"

ونزلت ووقفت أبص على الميكروباص ويقول لنفسي إني معنديش ريحة  
الدم!!!

من أجل ذلك بطلب من كل راكب يحس إن الراكب اللي جنبه عايز يتكلم  
ويفضض يسيبه يتكلم ويفضض ويسمع منه؛ لأن أحياناً الواحد بيبقى عايز  
يطلع اللي جواه لحد غريب بعيد ممكن مش هيشوفه تاني أبداً بدل ما يقوله  
لحد قريب منه وتحصل مشاكل تزود من همه، هو بس محتاج حد يسمعه.

## مادة (١٩)

### الثقافة

على كل راكب ميكروباص أن يتمتع بثقافة ذات مستوى رفيع، توازي ثقافة سائق الميكروباص وإلا عرّض نفسه للعقوبة من قِبَل السائق.

في أحد الأيام اللي الدنيا فيها بتبقى خارج من الشغل مش طايق نفسك ولا طايق حد يكلمك، ولو حد قالك مساء الخير هتقلب الدنيا وهتسمّعه كل الكلام اللي كان نفسك تقوله لمديريك وهو عمال يطلع القطط الفاطسة في الشغل اللي أنت عامله، وللحظ تركب الميكروباص مع سواق مثقف وعمال يتكلم عن أولياء الله الصالحين وأهل البيت في مصر، ويصف جمال مسجد السيدة نفسية والراحة اللي الواحد بيحسها أما يصلي فيها، وبعدين دخل على الآثار في مصر القديمة وشارع المعز والقلعة وترب الإمام الشافعي، مش عارفة ليه! ثم بدأت المسابقة الثقافية وبدأ يسألنا تعرفوا أنتوا

راكبين من أول عباس، تعرفوا مين عباس ده؟ والركاب صمت رهيب  
محدث بيرد يقوم يسكت شوية، طب تعرفوا مين مصطفى النحاس؟  
وبردوا محدش بيرد وابتدا يكلمنا بنبرة صوت أعلى وفيها حدة شوية، طب  
تعرفوا مين مكرم عبيد؟ وبردوا محدش بيرد وبس بدأ يدينا درس في الثقافة  
وازاي هي مهمة للإنسان، وإنما جيل خايب وميعرفش حاجة عن بلده، وإنما  
بنعدّي على الشوارع دي كل يوم ومكلفناش خاطرنا نعرف مين الناس دي،  
وبدأ يغلط في الشعب كله وأنه شعب ناكر للجميل، ويقول إننا كده  
مبندّرش الناس اللي بتتعب وتضحى علشاننا، وفجأة واحد من الركاب  
نطق وقاله عايز أنزل شارع عبد الحميد بدوي يا اسطى، بس السواق زي ما  
يكون ما صدق حد فينا نطق مسك في الراكب ودار الحوار التالي:

السواق: أنت تعرف مين عبد الحميد بدوي ده؟

الراكب: بكل ثقة طبعًا طبعًا، أعرفه أمال إيه..

السواق: طب قولني هو عمل إيه؟!

الراكب: واشمعنا ده يعني مش عارفه!

السواق: لأ طبعًا عارف.

الراكب: طب قولني كده هو عمل إيه..

السواق: لا قول أنت الأول..

الراكب: ولا أنت عارف ولا حاجة بس عمال تبستف فينا من ساعة ما ركبنا

مين ده ومين ده!

وهنا نطق الراكب كلهم في نفس واحد: والله ما هو قايل غير لما تقول أنت هو عمل إيه..

الراكب: خلاص يا جماعة سيبوه بقى عارف كل دول ومش عارف الأستاذ عبد الحميد بدوي!  
السواق: خلاص يا أستاذ.

وأحس السواق بنظرات الشر تتطاير من أعين الراكب، قام قايل صلوا علي النبي يا جماعة حصل خير خلاص أدينا وصلنا عند الشارع أهو أتفضل إنزل يا أستاذ، يقوم الراكب وهو نازل يقولنا والنعمة أنا أول مرة أسمع عن الأستاذ عبد الحميد بدوي ده النهاردة وأنا بأخذ من صاحبي العنوان!!!

من أجل ذلك بقول لكل سواق مثقف: آحنا مش جيل ناكر للجميل ولا حاجة، إحنا والله فينا كتير عارف مين هو الكاتب الكبير عباس محمود العقاد، ورئيس حزب الوفد، وكما كان يطلق عليه زعيم الأمة مصطفى النحاس باشا، بس بأمانه رينا مكتتش أعرف مين عبد الحميد بدوي بس بحث على جوجل في دقيقة عرفنا مين هو، فخرجوا من كل سائق يسيينا في حالنا، إحنا خارجين من شغلنا مش طايقين نفسنا مش وقت أسئلة، كفاية اتهرينا أسئلة طول النهار في الشغل.



## مادة (٢٠)

# اتركوهم إنهم لا يعلمون

على الركاب كبار السن \_ وهنا ليس المعنى بهم من تخطوا الستين عامًا، ولكن كل من يذهب إلى عمله بالميكروباص أياً كان عمره \_ عدم النظر شذراً لراكبي الميكروباص من صغار السن \_ طلبة المدارس والمعاهد والكليات \_ اتركوهم فهم لا يعلمون.

في أحد أيام بداية الدراسة بتكون الميكروباصات زحمة جداً؛ لأن طلبة الجامعات والمعاهد يروحوا كلهم عشان يدفعوا المصاريف وياخدوا الجدول، قال يعني هيحضروا وكده، وتلاقي البنات بيدوا ميعاد لبعض في الموقف وطبعاً كالعادة واحدة بتيجي قبل واحدة، وتقعّد تدور عليها في الموقف، وطبعاً مبتلاقيهاش تقوم تطلع الموبايل وتتصل بيها ثم يحدث الآتي:

بنت رقم ١ : أنتِ فين يا حيوانة أنا بقالي ساعة مستنياكِ..

بنت رقم ٢ : \_طبعاً إحنا مش سامعين\_ بس الخبرة بتقول إنها قالت لها "خلاص أنا داخلة عليكِ أهو"

وهنا يبدأ باقي زمايل الكفاح من الركاب اللي اتخرجوا واشتغلوا وواقفين مستنيين الميكروباصات بالنظر شذراً للبنت، وتبدأ البنت ترجع إلى الورا، وتشوف مكان على جنب تقف فيه، وكل ده وإحنا واقفين مش لاقين ميكروباص نركبه ثم يحدث الآتي:

تيجي البنت رقم ٢ من ظهر البنت رقم ١ وتخضها تقوم البنت رقم ١ بصوت عالي "خضيتني يا حيوانة" وبعدين يحضنوا بعض وهاتك يا بوس وواحشاني ياندلة كل كده مشوفكيش!

وكل ده والركاب بصات القرف بتزيد، وفي ناس بتتكلم كلام في سرها بالخبرة كده أقدر أقول إنها شتيمة..

بنت رقم ١ : قوليلي عاملة إيه؟!

بنت رقم ٢ : بس اسكتي؛ أحمد مطلع عيني كل يوم خناق على الاستوري اللي بحطها على الفيس والانستجرام..

وهنا باقي الركاب كل اتنين يقفوا جنب بعض ويبدأ كل واحد منهم يقول الشتيمة اللي نفسه فيها، زي إيه قلة الأدب دي بنات مش مترية، وفجأه لقيت واحدة ست يبدو عليها إنها موظفة في جهة حكومية، تقف جنبي وتقول لي "إيه القرف ده" وأنا أبصلها وأسكت، "عجبك كده" وأنا بردو ساكتة لحد ما هبت فيا وقالت لي "أنا مش بكلمك؟!" أنا \_باستعباط

السنين\_ "حضرتك بتكلميني أنا! معلى أصلي بفكر هعمل إيه أصلي  
اناخرت خالص على ميعاد الشغل" تقوم تقولي "أنت مش شايفة اللي  
بيحصل؟! " وبيص لقيت على مرمى البصر ميكروباص داخل على  
الموقف فريت عليها وقولت لها "أيوه شايفة بس أنا هقول لحضرتك  
حكمة لازم تحطيتها حلقة في ودنك" ردت\_ بقرف\_ "حكمة إيه دي؟! "  
قلت لها" اتركيهم إنهم لا يعلمون" قلت كدة وجريت على الميكروباص  
ودفست نفسي وسط الحشد وركبت وأنا متأكدة إنها لو إيدها طالتني  
هتضربني وكفاية عليا الشتيمة اللي هتشتتها عليا مع اللي هيبجي حظه  
ويقف جنبها!!!

من أجل ذلك بقول لكل الركاب اللي اخرجوا واشتغلوا يسيبوا اللي لسه  
متخرجوش في حالهم؛ أهو كلها سنتين ثلاثة وييجوا يقفوا الوقفة دي جنبنا،  
ويبقوا قرفانين من الدنيا واللي فيها ومش طايقين نفسهم ومناخيرهم تبقى  
منفوشة على طول من القرف كده زينا، فاتركوهم إنهم لا يعلمون.



## مادة (٢١)

# صناعة الأحذية

على كل العاملين في صناعة الأحذية في مصر مراعاة ظروف ركاب الميكروباص وتصميم وتنفيذ الأحذية بالطريقة التي تناسب هؤلاء الركاب لأن راحة الجسم تبدأ من القدمين.

من المعروف طبعاً لدى ركاب الميكروباص أن العيد الصغير عيد اللبس والعيد الكبير عيد اللحمة، ولذلك عند العودة للعمل ونزول جميع الموظفين للشغل؛ طبعاً لأننا راجعين من إجازة ومينفعش حد يغيب، بيتحول موقف الميكروباص إلى مول كبير معروض فيه كل أنواع الملابس والأحذية، وكل الركاب والسواقين عبارة عن منيكانات، كله بيبقى لابس لبس جديد من فوق لتحت وبيبقى عامل ألف حساب لكل حركة، وبنبقى خايفين نجري كالعادة ورا الميكروباص لحد يدوس لواحد على الجزمة

ولما يكرمش له القميص، ولما يبجي ميكروباص كراسيه مش كويسة وطبعًا ده بيعرفوه الناس الخبرة بتبقى بتتعاظم على بعض وكل واحد يقول للتاني اتفضل حضرتك الأول، وطبعًا اللي بيركب هم المستجدين معدومي الخبرة، الكلام ده الصبح وإحنا رايعين، أما بقى وإحنا راجعين الوضع مختلف تمامًا؛ يبقى كل واحد نفسه يروح بأقصى سرعة؛ لأن الجزم بتبقى جديدة وضيقة شوية لسه مريحتش معانا، فالبنات والولاد الصغرين بيتقوا لسه مكسوفين وواقفين ماسكين نفسهم بالعافية، أما الرجالة والستات الكبار بيكعبوا كلهم الجزم ونبدأ بقى أي ميكروباص يبجي - حتى لو كانت بعض الكراسي فيه من غير ظهر - كله بيهجم عليه والزق والزعيق يشتغل، وأثر الجزم الجديدة يمتد لتاني يوم تلاقي الجزم كلها قديمة، والبنات والستات البلاستر مالي رجلهم والحركة بتبقى بطيئة شوية، يعني الجري والزق بيقل كثير جدًا، والسؤال اللي بيحيرني كل عيد صغير: "هي الجزم في مصر كلها بتتصنع من إيه؟ وليه كل مرة بنصدق البياح وهو يقولنا إنها هتريح معانا في اللبس وهي مبتريحش إلا لما بتقرب ترمي؟! " ومحدثش يقولي اشترى ماركات غالية لأنها لو سلمت من عملية الجري والنظ في الميكروباص مش هتسلم من واحد يكون نازل يهرس وش الجزمة ويخليه مينفعش تاني، وساعتها الألم هيبقى في القلب مش في الرجل.

من أجل ذلك أطلب صناع الجزم في مصر " الله يخليكوا راعوا ركاب الميكروباصات الله يخليكوا بحبوحها شوية ربنا يقعهده في صحتكم "

## مادة (٢٢)

### الإصابات

على كل راكب تقبل الإصابات اللي هتحصل في الميكروباص دون أي نوع من أنواع الاحتجاج أو التذمر.

في كل الأيام اللي هتركب فيها الميكروباص الصبح وأنت رايح الشغل، أو آخر النهار وأنت راجع لازم تعرف إن الإصابات في الميكروباص تنقسم إلى قسمين رئيسين، وهما كالاتي:

القسم الأول: إصابات الجانب الأيمن من جسم الراكب.

وتنقسم إلى نوعين:

النوع الأول: الكدمات.

ويتكون عبارة عن كدمات أو إصابات في عظام الجانب الأيمن من الجسم، وتكون ناتجة عن وأنت بتنزل من الميكروباص سيكون السواق يتحرك فيقوم الباب مرزوع على رجلك أو إيدك؛ أنت ونصيبك، وفي الغالب أنت مبتحسش بأثر الكدمة غير ثاني أو ثالث يوم من حدوثها أما تلاقي جزء كبير من جسمك مزرق وتقعده تفكر هو إيه اللي حصل!

النوع الثاني: إصابات الرأس، أو الظهر، والأرجل.

و تحدث حسب موقعك في الميكروباص، دي بتبقي عن عبارة عن خبط ونقح في رأس الراكب ويتحصل لما يكون أحد الركاب قاعد وراك ويحمل حقيبة وييجي ينزل، وعلشان يقوم من الكرسي أصلاً لازم يمسك في الكرسي اللي قدامه، ودي أول نقحه بتصيبك، ومكانها يكون حسب طولك لو أنت طويل هتيجي في ظهر كط أما لو كنت قصير فالنقحة حتمًا هتيجي في رأسك، قوة النقحة تعتمد على ما بداخل الشنطة، ومرة ثانية بردوا أنت ونصيبك بقى وده كده بسم الله الرحمن الرحيم القومة بس لسه بقى لما يعدي من جنبك حتمًا ولا بد هيهرس رجلك، ولازم تراعي إنه هيكون متوتر لأن السواق هيفضل يهدده إنه هيمشي وهيقوله "يلا يارب نخلص، الونش جاي" والكلام ده.. فطبعًا هينزل بأقصى سرعة ولا بيالي بأرجل أو رؤوس أحد.

القسم الثاني: إصابات الجانب الأيسر من جسم الراكب.

وتنقسم إلى نوعين:

النوع الأول: الكدمات.

ويتكون عبارة عن كدمات أو إصابات في عظام الجانب الأيسر من الجسم وتكون ناتجة عن وأنت بتطلع الميكروباص بيكون السواق بيهدهد ويتحرك وبيقولك بسرعة يلا، فيقوم الباب مرزوع على رجلك أو إيدك\_ أنت ونصيبك\_ ودي في الغالب بتكون كدمات كما وضعنا في القسم الأول من إصابات الجانب الأيمن.

النوع الثاني: الحروق والاختناقات.

وتحدث غالبًا في فصل الصيف لكل راكب يبجي حظه ويقعد جنب الشباك ويكون طلبة المدارس والجامعات في إجازة؛ فالميكروباص بيقف كثير علشان يحمل ومع ارتفاع درجة الحرارة الكراسي اللي جنب الشباك بتبقى نار، وتبيجي تقعد بقى عليها أنت يا معلم وطبعًا من الإحراج قليل قوي اللي يفتح بقه وغالبًا بيبقى من المستجدين؛ لأن ذوي الخبرة بيرفض يركب، أو لو مضطر بيبقى عارف اللي هيحصل له؛ فمينطقش ويصبر ويحتسب عند الله.. ولا يقتصر الأمر عند ذلك فحسب، كلاً؛ فقعدته جنب الشباك والشمس جاية عليه بتاثر تأثير بالغ على النصف الأيسر من الوجه واليد، وبتنزل من الميكروباص عبارة عن لونين\_ اليمين أفتح من الشمال\_ أما الاختناق يحدث لراكب واحد في الميكروباص: وهو الراكب اللي يبجي حظه ويقعد في آخر كنبه في الميكروباص شمال وحظه بقى لو يكون السواق شايل الشباك ومخليه إزاز، الراكب ده كده أمه دعت عليه والدعوة استجابت!!!

من أجل ذلك أطلب كل راكب\_ وخاصة اللي بيركبوا كل يوم\_ حاول  
تنوع من مكان ركوبك؛ لأن التنوع له جماله بس متعملش ناصح وتنشن  
على مكان معين، سلم أمرك لله لأنك معرض في أي وقت من زمن الرحلة  
إن حد ينزل وتقعده مكانه فاعرف إنك هتصاب يعني هتصاب لا مفر .

## مادة (٢٢)

### مكرر

تتبع هذه المادة رقم ٢٢ ولكنها تخص السيدات على كل سيدة من راكبي الميكروباصات الالتزام بمقعدها عند حدوث أي مشاجرة أمام الميكروباص وذلك لتفادي إصابة في الوجه.

في أحد الأيام السواق اتخانق مع عريية ملاكي ماشية جنبه، كلمة من هنا على شتيمة من هنا، نزل سواق الميكروباص وسواق الملاكي وشبطوا في بعض قدام باب الميكروباص وأنا كنت قاعدة وجنبي واحده بنت عماله تصوت وأنا أقولها يا بنتي متخافيش عادي دلوقتي يفوضوها ودي لا لا افرض كسروا الإزاز جيه في وشنا وأنا أقولها متخافيش إدي بس الخناقة ظهرك للإزاز ولو اتكسر أهو الخبطة في الظهر غير الوش هتعلم في وشك، وهي لا أنا لازم أنزل وأنا أقول لها يا بنتي لو نزلتي مش هتلاقي حاجه

تركيبها ودي مصممة قلت بقى أنا هقرف نفسي ليه إنزلي أنت حرة،  
وعملت نفسها ناصحة وبتزعم فيهم وبتزقهم وبتقولهم اوعوا أنا عايزة أنزل  
قوم هب جالها كوع في وشها وقامت مصوتة بعزم ما فيها آه آه وأنا سمعت  
صويتها فطست على روعي من الضحك وبقى هي عمالة تقول آه وأنا  
عمالة أضحك، وسبحان الله أول ما سموعها وهي بتصوت فضوا الخناقة  
وكل واحد ركب عربيته ومشى وهيه فضلت واقفه في الشارع حاطة إيديها  
على وشها وبتبصلي شذراً كأني أنا اللي نقحتها في وشها وأنا بسأل نفسي  
هي بتبصلي كده ليه وأنا عمالة أضحك كر كر كر!!!

من أجل ذلك أقول لكل بنت متعمليش نفسك ناصحة، وتنزلي وسط  
الخرافة فاكرة نفسك مين يعني هيسمعوا كلامك ويوسعوا الطريق  
لسيادتك! اسمعي الكلام متضحكيش عليك الناس.

## مادة (٢٣)

### الستّ وعيالها

على كل راكب احترام أي أم راكبة الميكروباص هي وأولادها أيًا كان عدد الأولاد، وعدم إظهار أي اعتراض أو تبرم من شأنه تجريح فيها أو في أولادها.

في أحد الأيام اللي متعرفلهاش وصف كده؛ صيف ولا شتا، راجعة يوم من الشغل، وطبعًا الواحد بيخرج من الشغل حزين جدًا لا على شيء خالص غير إنه كان نفسه يقعد يستمتع أكثر بجو العمل الرائع! رحى الموقف لقيت ميكروباص بيحمل، لمحت كده إن الكنبه اللي ورا السواق فيها كرسي فاضل، قلت خير يا مسهل وأول ما وصلت عند الباب لقيت ست وعيالها وراجل قلت دي وجوزها لقيته نزل وقالى أنتوا ستات أقعدوا جنب بعض وطلعت قعدت وأنا أتذكر كلمة الأستاذ سعيد صالح في مسرحية

العيال كبرت "أنا مش عايز العضو ده يقعد جنبني بس هنعمل إيه أمر الله" الست والثلاث عيال كلهم قاعدين في مكان واحد واللي بيركب ميكروباص عارف إن أفضل مكان بتختاره الأم ديه هي الكنبه اللي ورا السواق وطبعاً اللي قاعد جنبها بيتعذب عذاب السنين، وكانوا ولد وبنت قاعدين في وشها في ظهر السائق وطفل رضيع الصراحة مقدرتش أعرف ولد ولا بنت، والولد شايل شنطة على ظهره وقاعد ساكت، أما البنت بقى أجاارك الله؛ شوية تنتظ وهي تقولها بس يا بنت، والبنت تقول عايزة أتنتظ يا ماما، وهي تقول بس، وأنا في بالي بقول هو ده اللي ربنا قدرك عليه تقولها بس! حرام عليك يا شيخة دي النطة دي كأنها على دماغي وشوية تزن عايزة تقعد جنب الشباك وطبعاً يتطلب إني أنا والراكب اللي جنبني نتزحزح شوية، وإحنا عمالين نبرطم ما تقعدني في البيت إيه اللي منزلك بالثلاث عيال! وطبعاً وسعنا لها المكان علشان سيادتها تقعد جنب الشباك وهي تقول للبنت والله أما نروح هوريك، وأنا في سري بقول لما تروحي ليه؟! وريها دلوقتي وخلصينا، وشوية عايزة تشرب مايه، وطبعاً قعدت الأم تدور على زجاجة المياة، وتزق يمين شمال وكل ده نغز في جنبني ورجلي لحد ما لقتها، وجاية تشرب البنت قامت البنت رفضت مامتها تشربها لازم تشرب لوحدها، وبعد مناقرة ادت البنت الزجاجة تشرب وعلشان اليوم يكمل قام السواق مفرمل علشان حد كسر عليه فنصف زجاجة المياة وقع عليها وهنا كانت لحظة الانفجار مني، وصرخت في الست يعني عاجبك كدة قامت بصالي وقالت معلش حقتك عليا أنا آسفة، وراحت باصة لبنتها وقالت والله لأوريك يا تاليا!!! وقامت بصالي تاني وقالتلي هعمل إيه أخوها عنده تمرين

في النادي وأنا معرفش أسيههم فين، وأبوهم مش بيستحمل يقعد معاهم أصل أنا اللي صممت إن الولد يدخل اختبارات النادي ده وهو كان مش موافق، إحنا مش أعضاء فيه ولا حاجة بس الولد بيلعب كويس فالنادي بيدخلنا باشتراك، ادعليه والنبى يمكن يطلع زي محمد صلاح ويبقى مستقبله أحسن من مستقبلنا، ومن غير متكلم قالت لي عارفة هتقولي إيه إحنا ليه مخدناش كرسيين مثلاً! أصل إحنا بنركب ميكروباصين رايح جاي وبحاول أوفرعلشان أبوه ميقلش المصاريف كتير فميرضاش يوديه تاني حقك عليا وبصتلها وأنا خلاص هعيط، وقولت لها ربنا يقوبك، ويجعل حظه زي محمد صلاح وأحسن بس ممكن أسألك ليه سميتي بتتك تاليا!!!

من أجل ذلك أطلب كل راكب ميكروباص أول ما يشوف أم وأولادها قاعدين زانقين أنفسهم في كرسي واحد يقدر موقف الأم ويدعي لها ربنا يقويها ويبارك لها في ولادها كفاية عليها حظها في جوزها.



## مادة (٢٤)

### المبادئ

على كل راكب الحفاظ على مبادئه وأخلاقه وعدم ترك ما يحدث له في الدنيا أن ينسيه مبادئه مهما حدث حتى تظل إنساناً.

في أحد الأيام الصيفية الحر اللي تحسن فيها إن الهواء كدة صهد جاي في وشك، ركبت الميكروباص من الكوربة، والميكروباص اتملى وقاعدة ست جنب الباب ومقعدة ابنها قدامها في الكنبة اللي في ظهر السواق، وأنا قاعدة في الكرسي القلاب اللي وراها، وقاعد ورايا واحد يتكلم في الموبايل مع عميل في الشركة عنده بيتكلموا في بنود في عقد تقريباً، وفي ميدان ألف مسكن وده عادة بيبقى زحمة؛ لأن الميكروباصات بتبقى مرصوطة صنفين برة الموقف وصف تالت بيبقى للباعة الجائلين، وجسر السويس ده بيتحول إلى حارة واحدة، يبجي ولد معدي الشارع براحته خالص قوم

السواق مخلصوش إنه ماشي بالراح، وراح السواق شتمه وتجراً الولد وقام شتم السواق وتنف في وشه، وهنا انفعل السواق ووقف العربية ونزل علشان يضرب الولد وواحد سواق ميكروباص نزل يضرب الولد مع زميله كده من غير ما يعرف المشكلة إيه والراجل اللي قاعد ورايا ويبتكلم في الموبايل قام وقف وزعق فيا أنت قاعدة! قومي نزليني وأنا بمتتهي البرود قلت له أنت نازل علشان تفض الخناقة خليك خليك دلوقتي هما هيفضوها دلوقتي، قام مزعق فيا بقولك قومي نزليني، رحت بصيت للولد ابن الست اللي قاعد جنب الباب وقتله ببرود افتح الباب خلينا ننزله، والولد متنح ومستغرب ليه الراجل عايز ينزل قام مزعق فينا افتحوا الباب خلينا نلحق غلبان قبل ما يتبهدل وفتح الولد الباب ونزل وأنقذ الولد من أيديهم، وعده الشارع وقعد يقول للسواق ده لو عيل من البياعين ولا سواقين التوك توك مكتتش افتريت عليه كده علشان عارف أنه هيلم عليك زمايله ومش هيسيبوك، لكن ده علشان غلبان تفتري عليه وتكسر بخاطره، وبعد ما طلع ركب تاني والميكروباص اتحرك قام بص ليا وقال لي أنا آسف إني زعقت فيك، بس كان لازم أنزل أذافع عن الولد أصل كسر خاطر والنفس وحش قوي والدنيا دوارة وهييجي يوم نبقي ضعفاء ونحتاج اللي يلحقنا، بصيت له وقولت له لا أبداً أنا اللي آسفة!!!

من أجل ذلك بطالب كل راكب اوعى اوعى تفقد مبادئك وأخلاقك وإنسانيتك من كتر اللي بتشوفه علشان هييجي يوم وتبقى بتدور على حد يقف جنبك وميكسرش بخاطرك حتى لو في ميكروباص.

## مادة (٢٥)

### الاحتفال بالفلاتين

يحظر على أي راكب الاحتفال بعيد الحب \_أو ما يطلق عليه الفلاتين\_ داخل الميكروباص حتى لا يؤذي مشاعر باقي الركاب.

في أحد أيام شهر فبراير اللي بيكون فيها البرد قارص، خرجت من الشغل وفي طريقي إلى الموقف لمحت بلالين حمراء قلت إيه ده هو الفلاتين النهارده ولا إيه!!! طلعت الموبايل أتأكد من التاريخ لقيت لسه النهاردة ١٢ في الشهر وبقيت أقول لنفسي خير يا رب هم عملوا، عيد تاني ولا إيه! بس معقول عيدين في نفس الشهر ووصلت الموقف مكشش في ميكروباصات والناس طبعًا مش طايقة نفسها، والولد والبنت ماسكين البلالين الحمراء وعمالين يهزروا مع بعض والناس اللي بتبص عليهم مقسمومة إلى نصين: اللي بيص بقرف واللي حزين على حاله، وشوية والهزار زاد وبدأ صوتهم

يعلي، كانت واقفة جنبي بنت وأنا وهي عمالين نبص ليهم ونضحك أصلنا عارفين آخرتها بتبقى إيه: يا بيسيوا بعض ويقعدوا يشتموا في بعض، يا إما بيتجوزوا بعض ويردوا يقعدوا يشتموا في بعض. فتشجعت وسألتها السؤال اللي محيرني من ساعة ما شوفت البلالين بترف في الهواء، هو مش لسه فاضل يومين على الفلانيتين؟ ردت عليا بلغة الخبير والعالم بيواطن الأمور لا لا الاحتفال يوم ١٤ فبراير ده كان زمان، دلوقتي الأهالي عرفت اليوم ده وبقت تمنع أولادها تنزل، أو أنهم يلبسوا أحمر وكده ويقعدوا يزعقوا؛ كنت فين؟ إتأخرت ليه؟ إيه اللي معاكي ده؟! وتحقيق ملوش آخر؛ فعلى إيه، نحفل قبلها بيوم أو يومين وخلاص ونريح نفسنا، وأقنعتني البنت بصراحة، وبدأت الميكروباصات تهل على مرمى البصر، وكل واحد بدأ يستعد بالوقوف في المكان المناسب اللي يسمح له ينظ في الميكروباص على طول قبل الباقيين، المهم نظيت في الميكروباص وبعد ما استقرت في القعدة في آخر كنية جنب الشباك، ببص جنبي لقيت الولد والبنت وبلالينهم قاعدين جنبي والهزار والضحك شغال، وأنا عمالة أبصلهم سمعت السواق يقول بصوت عالي، كل كنية تلم مع بعضها الأجرة وياريت فكة، أستنى الأستاذ يطلع فلوس؛ أبداً، يحسوا إنهم في ميكروباص؛ أبداً، جيت أدي فلوس أجرتي للكنبة اللي قدامي كان راجل رخم وقال لي أنت مش سمعتي السواق يقول كل كنية مع بعض، وهنا بقى مقدرتش، رحت مخبطة على كتف الأستاذ الحبوب وقلت له الأجرة مش هتدفعوا ولا إيه؟! ولقيت البنت اللي معاه بتزغلي وبتقول بصوت عالي مالها دي! بتتكلم كده ليه! ولسه هرد عليها قامت سيدة مبجله قاعدة في

الكرسي القلاب اللي قدامي لفت نفسها لورا وبعزم ما فيها قالت لها بتتكلم  
علشان بقالكوا ساعة راكبين ونزلين هي ء وميء وبلاينكوا قرفتنا،  
والسواق عمال يقول الأجرة الأجرة وانتوا ولا هنا، عرفتي بتتكلم كده ليه!  
وحسيت بانشكاح عظيم، وقلت للسيدة العظيمة دي ربنا يخليك يا طنط  
أيوه كده، وردت عليا ولا يهكم يا بنتي متشليش في نفسك ده ربنا كريم أنا  
حاسة بيك!!! وبقيت أسأل نفسي حاسة بيا يعني إيه؟ قصدها إيه الست  
دي!!!

من أجل ذلك بقول لكل حبوب وحبوبة بيركبوا الميكروباص: احتفلوا  
بعيد عن الميكروباص وأهله، إحنا ناس شقيانة وملناش في الحاجات ديه،  
وبعدين مكلفين ده كله بلالين وهدايا ومش هارين عليكموا تركبوا تاكسي!  
عجبي!!!



## مادة (٢٦)

### النقود القديمة

يحظر على أي راكب إعطاء السائق أي نقود قديمة في الأجرة، فلا بد أن تكون النقود صالحة للتداول وإلا عرض نفسه للعقوبة التي يراها السائق. في أحد أيام الجمعة قررت أنزل آخذ جولة في المحلات والمولات وأشوف أخبار الأسعار إيه لتحديد خطة صرف المرتب، وهستلف من ماما قد إيه، وبالفعل نزلت وخلصت الفرجة، ورحت أركب الميكروباص ودماغي مشغول بوضع الخطة التي بدأت ملامحها تتضح، وطلعت الأجرة فكة، واديتها للراكب اللي جنبي علشان مفيش أي حاجة تشوشر عليا وأنا مركزة في الخطة، فجأة لقيت البنت اللي قاعدة ورايا بتخبط على كتفي وبتقولي لو سمحتِ إدي للسواق الجنيه القديم ده، أنا مش هاخذه، وأنا قلت حاضر، أخذت الجنيه وقلت لراكب قاعد في الكرسي اللي قدامي

خلي السواق يغير الجنيه ده وبالفعل الجنيه وصل للسواق راح بصلي في المرايا وقعد يزقق ويقول ماله يا أبله الجنيه ماهو حلو أهو وشغال، وبعدين ما أنا واخده من راكب محترم زيه زيك كدة بالضبط، ومفتحتش بقي ولا قلت له حاجة، جاية أنتِ ليه تقولي مش واخده! ليه يعني فهميني؟! وكل مما أفتح بقي علشان أرد عليه وأقول له مش أنا صاحبة الجنيه، مفيش فايدة، ميدنيش فرصة أتكلم وراح قال للراكب رجع لها الجنيه خلاص هتخده، وراح مشغل أغاني مهرجانات بصوت عالي وأخذت الجنيه وبصيت للبنت اللي ورايا وبقولها عاجبك كده، وهي عامله نفسها من الهند ولا كأي بكلمها قلت لنفسي خليك في الخطة أنتِ وصلتي لفين آه أشتري ماسك للوش ولا للشعر ولا الاتنين؟! وبعدين شاور للميكروباص أحد الركاب فوقف الميكروباص وطلع الراكب وطلع الأجرة فكة راحت البنت ندهت على الراكب وقالت له خد الجنيه ده إديه للسواق وهات جنيه جديد من اللي معاك وبمسكنه كده قالت: أصل ادهوني وأنا مش هاعرف أصرفه، وطبعاً الراكب وافق، وكل ده والسواق مش سامع من صوت المهرجان اللي مشغله ووصلت الأجرة للسواق وبص للجنيه اللي في إيده وراح مفرمل فرملة جامدة وراح مدور وبص لي، وقال أنتِ إيه بتسبعطيني! مش ده الجنيه اللي رجعت هلك، والبنط طبعاً عاملة نفسها عبيطة وأنا لسه هنتق وأزعق فيه راح راكب محترم قاله هي مالهاش دعوة، الجنيه مش بتاعها بتاع الأنسة اللي وراها وهي علشان بنت متربية مردتش عليك أول مرة، وبعدين أنتِ مش قلت جنيه سليم وزى الفل مش عايز تاخده ليه بقي؟! راح السواق ماسك الجنيه ومقطعة ورميه من الشباك، وهو بيقول أهو غور في داهية

وساق بسرعة لدرجة إننا كلنا قاعدين مساكين في الكراسي لنطير فوق  
رؤوس بعض، ونزلت من الميكروباص وأنا بتشاهد على نفسي، ورجعت  
البيت وقلت لماما أنا عايضة منك ألف جنية كده وهبقى أرجعهم لك،  
راحت نفشت مناخيرها وزغرтли وقالت لي أنتِ بتستعطيني!!!  
من أجل ذلك بطالب كل راكب يدفع الأجرة مقبولة، ومستعبطش السواق  
محافظة على أرواح زملائك من الركاب.



## مادة (٢٧)

### الموسيقى

يحظر على أي راكب أن يقلل من الثقافة الموسيقية للسائق، والاعتقاد أنه يستمع لنوع محدد من الأغاني وإلا سوف يتعرض للعقوبة التي تتراءى للسائق.

في أحد الأيام اللي الواحد بيتقى فيها متأخر على ميعاد الشغل، ويفضل زمايلك كل خمس دقائق يتصلوا يسألوك أنت فين؟ المدير يسأل عليك، وصلت لموقف الميكروباصات وقلت لنفسي الواحد مش طايق نفسه أركب جنب السواق واخذ الكرسيين اللي قدام وأقعد براحتي وإيه يعني أرفع أجرة نفرين، أمال أنا بشتغل ليه، أهم حاجه محدش يضايقني ولا أطلع ولا أنزل، وبالفعل طلعت ركبت قدام والسواق سألني خلاص قدام قلت له أتكلم على الله، وقبل ما يتحرك الميكروباص من الموقف، اتصلت

بيا زميلتي وسألتنني أنتِ فين قلت لها خلاص الميكروباص هيطلع من الموقف أهو، أثناء حديثي معها السواق كان بيشغل الفلاشة قلت بس هو يوم باين من أوله هيشغل خبط ورقع وأنا قاعدة جنبه هي كده تبقى كملت، وفجأة لقيت طالع صوت الأستاذ عبد الحليم حافظ أغنية سواح! قلت يا سلام أكيد السواق ده جديد في سواقة الميكروباصات شويه ولقيت تليفون من زميلي ونفس السؤال أنتِ فين!!! وردت بروقان فظيخ، أنا في الميكروباص ما أتوا لسه مكلمني من خمس دقائق هكون يعني لحقت أوصل؟ في إيه يا جماعة مش معقول كدة! وخمس دقائق كمان لقيت المدير بيكلمني، قلت ليه كدة ما اليوم كان بدأ يتعدل، رديت عليه ونفس السؤال بردوا؛ أنتِ فين؟! ولقيت نفسي برد بقول أستغفر الله العظيم يا جماعة والله في الميكروباص، فقال لي أنتِ عايزة تفهميني إن في سواق ميكروباص هيشغل عبد الحليم حافظ على الصبح! إيه رأيك بقي إن اليوم ده مخصص منك وهتيجي وهتخلصي بردوا الشغل! وردت عليه يعني أنا هاجي وأشتغل وتخصص اليوم طب خليها نص يوم، رد عليا نص يوم للتأخير ونص يوم علشان تبقي تسمعي عبد الحليم على الصبح كويس!!! وهنا قررت آخذ حقي بطريقة أخرى قمت عليت صوتي وقلت وأنا هكذب ليه يعني! وبعدين ماله يعني سواق الميكروباص مش بني قدام ومن حقه يسمع عبد الحليم حافظ فيها إيه يعني! ليه نعيب على الناس كده، ما كلنا ولاد تسعة! وهنا انتبه سائق الميكروباص، وقال لي مين ده اللي بيعيب عليا؟! قلت له مديري مش مصدق إن فيه سواق ميكروباص بيسمع عبد الحليم! والسواق يرد ليه يعني قولي للمدير بتاعك آحنا ولاد ناس ومتربين

وأهالينا صارفين علينا، وأنا أقول للسواق صح فعلاً عندك حق، وفضل السواق يقول وكل ده وأنا فاتحة الخط والمدير عمال يسمع ولقيت نفسي خلاص قربت أنزل فقفلت الموبايل، وقلت له بعد إذتك تنزلني على جنب والسواق وأنا نازلة قالي ربنا يكون في عون، لو حد زعقلك ولا خصملك قوليلي وأنا أجبلك حقك، أنا هبقى موجود كل يوم في الموقف، وأنا \_بمنتهى الانشكاح\_ ربنا يخليك شكراً ونزلت وقفلت الباب، وأنا بفكر يا ترى ممكن ياخدلي حقي إزاي! هيضرب المدير مثلاً ولا يكسر له عربيته؟ تخليت المنظر وابتسمت ودخلت الشركة وأنا مبتسمة ابتسامة عريضة ولقيتهم واقفين لي على الباب وواحد يقول بقى دي منظر واحدة كانت راكبة ميكروباص! وواحدة ترد عليه ده ميكروباص الأستاذ عبد الحليم حافظ!!

من أجل ذلك يا ريت كل سواق ميكروباص يلتزم بتشغيل أغاني  
المهرجانات فقط علشان ميحبناش الكلام.